

【清】黎庶昌著 黎 鐸 龍先緒 點校

黎庶昌全集
八

上海古籍出版社

【清】黎庶昌著 黎鐸 龍先緒 點校

黎庶昌全集 八

上海古籍出版社

本冊目次

續古文辭類纂(卷二十四至卷二十八)	四八九三
拙尊園存書目	五一九三
拙尊園書目	五三〇三
黎庶昌詩文輯逸	五四三一
附錄一 傳記 祭文 像贊	五四五五
附錄二 黎庶昌年譜簡編	五四八一
附錄三 古泉書錄解題	五四九七

續古文辭類纂
三

王
猛
點
校

續古文辭類纂卷二十四

碑志類

施愚山

神岡山廟碑 施閏章，字尚白，號愚山，安徽宣城人。順治己丑進士，初任江西參

議，裁缺歸。康熙己未舉博學鴻辭，官侍讀。有《學餘堂集》。

廬陵之南十里，曰神岡山。其廟曰惠祐，祀太守彭城劉公。山故名翠峰，以其廟神之孔赫也，相與神之，僉謂之「神岡」云。公諱竺，仕陳，爲廬陵太守，政洽於郡人。既卒，其民悲思叫呼，謂公嘉惠我邦，吾儕小人弗敢忘，其擇地祠之，作廟於山之岡。雨暘之不若，百穀之不堅實，疾病之不時去，凡有冀而不獲，它無可告，則惟神是歸。先時邑人龍昌裔，家積粟，利在歲饑，以涌其糴。會旱，私丐神，請更彌月勿雨。是日輒大雨，雷震昌裔死廟下，視其髮中，得禱旱之詞。于是民有懷惠不仁者，心掉魂奪，亟走去，不敢入廟。其神大顯。南唐保大中贈工部尚書明惠侯，宋宣和中賜「惠祐廟」額。紹興三年，封嘉應侯。徐鉉、胡銓先後紀其事。其山拳曲而憑江，水清林茂，山川雲物之美，具可登望。余間從賓僚往游，顧廟碑石壞闕文字，謂廬陵縣令于君

藻曰：「劉公澤在民，廟食斯土，禱之輒應，又能奮餘怒擊頑貪，震悚觀聽，補吏職所不逮，惠且能義。今碑版缺剥，即事存傳記，來觀之人猝無徵覽，奚以顯神德而禁民非？」于君曰：「請具石，公其撰詞。」于是大書其事，系之歌，以享神。其詞曰：

山之椒雲油油，公駕遊兮赤虬，鞭斥猛獸兮俾我以休。山之阿楓冥冥，公其降兮霓旌，膏我黍苗兮甘雨以零。擊鼉鼓兮薦江芷，公弭節兮飲食燕喜。山有岡兮水有涯，公竭而去兮來何遲。生我牧兮歿我師，疇敢不率兮公知之。

姜湛園 安城楊君墓志銘

姜宸英，字西溟，號湛園，浙江慈谿人。康熙丁丑進士，官編修。有《湛園未定稿》。

康熙二十八年己巳春，車駕南巡至蘇州，有紹興人士楊賓及其弟寶，以父得罪徙寧古塔久，泣血奔叩行在，願身率妻子代父戍。上駐輦問之，以其罪名重，非祖制，不允。又沿御舟行數百里，呼號亂突騎從間，人馬蹂踐，衛士執鞭筆雨下。賓兄弟出強辭與抗，幾斃，終不得達。由是見者皆感泣，稱爲孝子。孝子既而諗知其父得罪狀，又有可憐者，賓父以壬寅冬徙塞外，其行述所謂安城府君者也。

君既謫塞外，是時賓年纔十三，後二十八年，賓始得往視之。又二年，辛未冬十一月某日，

君竟歿于戍所。君所坐于國法不得還葬，妻隨行者例留之。賓聞赴，衰服跪刑部、兵部門，凡四百五十有五，號泣陳訴，垢形骨立，酸動行路，當事者憐之，爲求比例，遂得請。蓋上之曲成人孝如此。

今年九月某日，寶扶柩抵潞河，母范孺人亦隨到。賓與余族弟寓節善，數爲余述其賢，既聞余在都，則泣請曰：「吾父以徇友譴死，非子寵之銘，不足以慰吾親于地下。」銘曰：

君諱春華，越其更名。友聲其字，居越安城。晚遂自號，不忘所生。父蕃業儒，既而不就。累官總兵，副鎮京口。君年十七，補博士員。適當明季，厭經生言。散金結客，豪俠滿門。卒以賈禍，亦不言冤。君之得禍，以友滋蔓。友亦被牽，密書屬援。爲邏者獲，友固弗承。君謂我出，事始得明。國有常憲，棄友于市。處君未減，南冠而縶。君初出塞，雪花如掌。朔風狂吹，指墮馬上。渡混同江，那木色齊。種種惡道，及諸阿機。萬木排比，仰不見天。老根亂石，斷冰結連。不受馬蹄，起踣其間。異鳥怪獸，叢哭林嗥。同侶失色，百聲號啣。君獨凝睇，山川阨塞。詭形殊勢，筆之于冊。忽然長嘯，攬轡支策。掉頭吟詠，不爲戚戚。人傳君貌，有頤而黑。修髯大聲，雙眸電射。至則謾罵，其守土士。彼愕不知，或瞠而視。時法初立，漢人罕至。至輒爲傭，犬彘之飼。君教入山，斫木爲屋。蔽以木皮，炕銚具足。以我所攜，布帛絲枲。易其魚皮，人稍知市。爲賈而豐，教以字書。禮讓蔚興，藹藹邨墟。贖諸罪隸，生者養之。死給之輓，婚喪以時。不足爭助，後則爲恥。曰不可見，楊馬法矣。長老之稱，馬法是云。馬法既死，哭聲

田田。柩所過道，設祭魚飧。綿壽七十，子三賓寶。季名曰寵，女二孫九。女孫亦二，幼尚未字。初君之出，其色揚揚。視死與生，如去來常。況死而歸，先塋是依。是惟有子，以釋君悲。子也式穀，守爾初服。銘勒諸幽，允臧墨卜。魏叔子云：「以銘辭叙生平，不漏不支，妥帖排舉。蓋上揜荆公，下軼時賢者也。」

姚姬傳 光祿大夫刑部尚書贈太傅錢文端公墓志銘并序

刑部尚書嘉興錢公，登朝爲名卿，老而告歸。上承聖人之殊眷，下爲海內文學之士宗仰爲耆碩者。又二十餘年，乾隆三十九年正月辛酉，薨于里。疏聞，上悼惜甚，至製詩哀之，命贈太傅，祀于賢良祠，謚之曰文端，賜祭葬如制，特予銀千兩治喪。其子汝誠，以是年十二月葬公武原生坊南化城，請予爲銘。按狀，公諱陳群，字主敬。明給事中，贈太常卿徽者，公六世祖也。曾祖諱陞，祖諱瑞徵，考諱綸光，三世皆以公貴，贈光祿大夫。妣皆一品夫人。公之少也，讀書穎悟過人，未二十游京師，則已與諸名士論文，唱和相得。時言才士，即曰錢君。康熙四十年，公成進士，改庶吉士，授職編修。世宗時三進官至侍讀學士，充日講起居注官，直南書房。今上登極，擢通政使司右通政，四進官至刑部侍郎。以疾歸里。

公當事持大體，守成法。爲編修時，嘗爲陝西宣諭化導使，在事稱爲能。及久任刑部，讞獄

剖晰得情，甚稱職。然上尤愛公詩文之美，嘗樂與考論今古，稱爲故人。公之歸也，上每思見之。公以所作詩奏進，上覽之未嘗不稱善也。公歸後五年，上南巡，賜在家食俸。後三年，皇太后慈壽七十，公入都慶祝，命加尚書銜，與九老之會，圖形禁中。後又兩值南巡，加命以刑部尚書致仕，晉太子太傅。至皇太后壽八十，公再入都，年八十六矣，猶健步。上見公益喜，賜騎馬紫禁城，再與九老之會。公子汝誠，爲戶部侍郎，侍養于家。及是，隨公入朝，父子卿貳，持杖扶攜，出入宮苑禁闈之中，觀者以爲榮。其歸也，又賜詩以寵其行。公嘗一爲會試總裁，三典鄉試，再提督學政。及年益高，天下文士翕然趨之，公亦和易，與後進談說往復，論難不厭；吟誦詩章，音節抑揚要眇；說先朝故事，歷歷首尾，如披史傳。聽者每至中夜忘疲。是時，長洲沈文愨公在吳，公在嘉興，天下以爲齊名，雖上亦稱爲二老也。文愨既歿，後四年，公亦亡。于是上自九重，下洎朝士，以及閭閻識與不識，莫不歎息悲傷，謂東南耆舊盡矣。公年八十又九，再娶皆俞氏，皆一品夫人，與公祔葬。子七：長侍郎汝誠，次汝恭、汝愨、汝隨、汝豐、汝弼，公以汝弼嗣弟界後；幼子汝器。上南巡，爲公賜汝器爲舉人。女九。孫男十五。曾孫二。銘曰：

多士雲興，蔚此昌時。孰爲魁英，備履福祺。秀水之郭，鴛湖之湄。公起登朝，作吏之儀。歸樂太平，爲群士師。上與天子，賡和其辭。衆望哀然，既老不衰。我嘗識之，丹頰白髭。飲酒笑談，寡怒多怡。國有上瑞，匪鸞匪芝。進觀公貌，退讀公詩。詩則永留，貌不可追。刻示後

來，吾言不欺。

姚姬傳 袁隨園君墓志銘并序

君錢塘袁氏，諱枚，字子才。其仕在官有名績矣；解官後，作園江寧西城居之，曰「隨園」，世稱隨園先生，乃尤著云。祖諱錡，考諱濱，叔父鴻，皆以貧游幕四方。君之少也，爲學自成。年二十一，自錢塘至廣西，省叔父于巡撫幕中。巡撫金公鉉一見異之，試以《銅鼓賦》，立就，甚瑰麗。會開博學鴻詞科，即舉君。時舉二百餘人，惟君最少。及試，報罷。中乾隆戊午科順天鄉試。次年成進士，改庶吉士。散館，又改發江南爲知縣。最後調江寧知縣。江寧故巨邑，難治。時尹文端公爲總督，最知君才。君亦遇事盡其能，無所迴避，事無不舉矣。既而去職家居，再起發陝西。甫及陝，遭父喪歸，終居江寧。

君本以文章入翰林，有聲，而忽擯外；及爲知縣，著才矣，而仕卒不進。自陝歸，年甫四十，遂絕意仕宦，盡其才以爲文辭歌詩。足迹造東南山水，佳處皆遍，其瑰奇幽邈，一發于文章，以自喜其意。四方士至江南，必造隨園投詩文，幾無虛日。君園館花竹水石，幽深靜麗，至櫺檻器具，皆精好。所以待賓客者甚盛，與人留連不倦。見人善，稱之不容口；後進少年詩文一言之美，君必能舉其詞，爲人誦焉。

君古文、四六體，皆能自發其思，通乎古法；于爲詩尤縱才力所至，世人心所欲出不能達者，悉爲達之。士多效其體，故隨園詩文集，上自朝廷公卿，下至市井負販，皆知貴重之。海外琉球，有來求其書者。君仕雖不顯，而世謂百餘年來，極山林之樂，獲文章之名，蓋未有及君也。君始出試爲溧水令，其考自遠來縣治，疑子年少無吏能，試匿名訪諸野。皆曰：「吾邑有少年袁知縣，乃大好官也。」考乃喜，入官舍。在江寧，嘗朝治事，夜召士飲酒賦詩，而尤多名蹟。江寧市中以所判事作歌曲，刻行四方。君以爲不足道，後絕不欲人述其吏治云。

君卒于嘉慶二年十一月十七日，年八十二。夫人王氏無子，撫從父弟樹子通爲子，既而側室鍾氏又生子遲。孫二，曰初，曰禧。始君葬父母于所居小倉山北，遺命以己祔。嘉慶三年十二月乙卯，祔葬小倉山墓左。桐城姚鼐以君與先世有交，而鼐居江寧，從君遊最久，君歿，遂爲之銘曰：

粵有耆龐，才博以豐。出不可窮，匪雕而工。文士是宗，名越海邦。藹如其沖，其產越中。載官倚江，以老以終。兩世阡同，銘是幽宮。

姚姬傳 中憲大夫雲南臨安府知府丹徒王君墓志銘并序

君諱文治，字禹卿，丹徒人。自少以文章、書法稱于天下，中乾隆三十五年一甲三名進士，

授編修，爲壬午科順天鄉試同考官，癸未科會試同考官。其年御試翰林第一，擢侍讀，署日講官，旋命爲雲南臨安府知府，數年以屬吏事鐫級去任。其後當復職矣，而君厭吏事，遂不復就官。高宗南巡，至錢塘僧寺，見君書碑，大賞愛之。內廷臣有告君、招君出者，君亦不應。

君之歸也，買僮教之度曲，行無遠近，必以歌伶一部自隨。其辨論音樂，窮極幽渺。客至君家，張樂共聽，窮朝暮不倦。海內求君書者，歲有餽遺，率費于聲伎，人或諫之不聽，其自喜顧彌甚也。然至客去樂散，默然禪定，夜坐脅未嘗至席，持佛戒，日食蔬果而已。如是數十年，其用意不易測如此。

君少嘗渡海至琉球，琉球人傳寶其翰墨。爲文尚瑰麗，至老歸于平淡。其詩與書，尤能盡古今之變，而自成體。君嘗自言：「吾詩、字皆禪理也。」余與君相知既久，嘉慶三年秋過丹徒訪君，君邀之涉江，風雨中登焦山東昇閣，臨望滄海邈然，言蟬蛻萬物無生之理。自是不復見君。今君子來訃，以嘉慶七年四月二十六日跌坐室中逝矣。妻女子孫來訣，不爲動容；問身後事，不答。然則君殆莊生所謂游方之外與造物爲人者耶？著作文藝雖工妙，特君寄迹而已，況其于伎樂遊戲之事乎！

君年七十三。夫人黃氏。生子槐慶。女四，婿曰溧陽狄某、丹徒陳某、商丘陳杲、長洲宋懋祁。孫男六。將葬君某所，鼎爲之銘以代送窆。鼎爲《王氏秀山阡表》具君世矣，故不復述。銘曰：

茫乎其來何從乎？苟乎其往何終乎？嗟吾禹卿乎！生而燕樂，與世同乎！名表于翰墨之叢乎！骨蛻于黃壤之宮乎！脩乎寥乎，憑日月之光而遊天地之鴻蒙乎！銘辭高絕，邈然難攀。

姚姬傳 四川川北道按察副使鹿公墓志銘并序

公諱邁祖，字紹聞，定興鹿氏，始明監察御史久徵有直諫名。久徵生正，明熹宗時，嘗營救左、魏諸君子之難，天下稱爲鹿太公者也。太公生太常少卿繼善，殉節死，謚忠節。忠節子曰化麟，舉鄉試第一，居父喪歿，人謂之孝子。孝子之子諱盡心，公之曾祖也，爲安邑令。公祖諱賓仕，本朝爲陝西道監察御史。考諱聖權，封奉政大夫。

公雍正八年庶吉士，授編修，以四川川北道按察副使罷官，乾隆二十九年十二月十四日卒于家，年六十。夫人王氏，先卒。子二：琪，廩膳生；次預，早卒。以乾隆三十二年某月日葬公及夫人于江村祖塋之側。銘曰：

鹿氏在明，忠孝久稱。有肖無替，累以世嗣。巍副使公，彪文縝質。始作詞臣，究通經術。匪曰能言，而允行之。以學事君，在心不欺。命作御史，有辭謇謇。君子所予，小人所憚。巡察帝城，周閱殷廣。閉杜謁言，搜邪伐黨。給事于中，掌禮吏科。審較牘奏，詳而不苛。轉運奉

使，湘湖之南。群吏放手，民則弗堪。覈正斗甬，公以躬監。正稅罔贏，誅責貪愼。有盜殺人，吏論如法。撫軍卻之，謂不當執。罷按察使，而令公攝。將飭律令，意授威懼。或旁諷公，公曰：「不可。佑賊詭正，寧禍及我。言忤上官，解其柄持。」改任川北，畀以疲羸。親入山林，掘盜根株。哀問民生，慰恤瘠枯。直時軍興，征金川醜。以馬濟軍，百城交走。或應于前，而乏于後。歸罪邑令，大吏藉口。公曰：「憊矣，非令之咎。」予以身任，遂遭彈奏。吏籍其家，敝几故書。怨嫉之徒，媿感嗟吁。詔荷公校，以重軍罰。大吏憐公，勸使私脫。公曰：「詔乎，脫余則爲。苟非君命，敢奸以欺？」卒朝夕荷，西師隨罷。既有定功，公亦蒙赦。公之在官，嶷嶷剛毅。公之在家，愉愉孝弟。歸遭父喪，以毀受病。秉道終身，卒斃于正。有懿夫人，飭身約己。佐公清節，誼不爲侈。同穴江村，高墳磊砢。我銘直諒，以厲嬖姁。

姚姬傳 汪玉飛墓志銘 并序

汪生行忠信，而立志甚高，不與今世士同流，謂士舍宋儒程、朱之所道以爲學，舉不足云學也。晝動而暮休，必考一日所爲得失離合，悉書于一冊，以自爲戒勸。事其父兄，撫其妻子，交其師友，循今世之禮，通以古人之意。見者未嘗不以爲當于人心。爲今世場屋之文，必求發古聖賢之旨，而不爲苟美。余主鍾山書院，生以上元學生來爲弟子。余德薄，不足爲生益，然生親

余尤至，相見論說依依者幾三年，而生遽死。生故有咯血疾，而爲學摯思不懈，余時戒之。乾隆五十六年秋冬間，忽大甚，至失音。余方歸里，亟以爲憂。其次年春正月，疾進，時時念余，遂卒。余復至，遂不見生。嗟乎！使生不死，必追逮古賢人，必有立于天下。不幸亡，學未成，行未著，知其異于今世學者，惟余而已。生年二十六。其父七十餘。子雲官，甫六歲。妻楊氏，割肱療生，不愈，終爲瘻而守之。余爲擇攝山東南，故曇花寺址右阜葬生，而爲銘曰：

古秣陵，明南畿。粵汪生，挺產茲。名兆虹，字玉飛。聖不作，望緡哉。復有轍，崇有階。連勸志，胡弗幾。抗發塗，蹶駿材。芒天乎，理則乖。痛無沫，伐石埋。絜姚肅，綴此辭。

吳殿麟 鄭用牧先生墓志銘

先生休寧人也。休寧與歙境相鄰，而先生產于兩縣人文最盛之日。當是時，以考訂之學名天下者，有戴東原、程易田、金櫟中；以古文名者，有吳蕙川；以制舉之文名者，則有潘在澗、胡澹中、胡珮聲、胡授穀、方雨三、方晞原，以逮先生。先生與此數君皆友善，數相過從，各以所長相攻錯。然是時漢儒之學盛行，求其于四子、六經之書，力宗程、朱之釋，而不可有片語之違者，則惟先生。故先生雖與諸君子相得甚歡，及講論經義，常至于不合而爭。

嗚呼！觀先生志趣所嚮往者如是，則其行可知矣。夫以君子之論觀之，宗程、朱者貴宗其

道也，宗其道，即宜宗其言固也。然有其言雖善，而或揆之立言者之旨，偶未之符，不惟不足貽玷高賢，亦不必爲高賢蓋藏也。後之人苟克窮思研慮，契聖人之警敎于微茫，而不敢盡與之比附。吾知程、朱公天下萬世之心，且欣然樂與之也；必一言一字阿所好而從之，未矣。然當此過崇漢學以抑宋賢之世，如先生者，蓋可多得哉？先生諱牧，字用牧。年七十有□，以歲貢生終。子五人，曰珠，曰文，皆縣學生。將以某年月日葬先生于某里之原，而乞銘于予。予素善君者，乃爲之銘曰：

亶亶乎其行修，郁郁乎其文工。然而不可挽者，君命之窮。嗚呼！於命爲窮，於道爲通，君又奚恫！

吳殿麟 翰林院修撰金先生墓志銘

先生姓金氏，諱榜，字藁中，一字輔之，晚更號檠齋。先世自杭州徙歙北呈坎，二十二傳，徙郡城，又六傳，而先生之曾祖五聚，徙歙北趙邨。祖公著，乃自趙邨復徙巖鎮，今爲巖鎮人。乾隆戊辰進士，官吏部稽勳司主事，諱長溥者，先生之父也。以翰林官御史，出爲浙江督糧道，諱雲槐者，先生之兄也。先生少負偉志，思博學深造爲通儒，而不屑溺沒聰明于科舉之學。受經學于江永慎修，暨戴震東原，學詩、古文辭于吾師劉大槐耕南，學科舉之文于方粲如朴山。數君